

周氏醫學叢書

第五十七冊



周澂之所

著醫書



自世遠狃榛渾沌之天以失民知火粒嗜慾之源日開
六鑿相攘於靈臺五節潛乖於厲氣荆弋葦矢不弭猶
狂之災夏疥春疢遂眇鵠居之壽於是神農鞭草岐伯
受鍼七十二每以勤民八十一難而闡奧布越人之指
卽解支蘭過矯氏之門便知求艾紂絕天上罕逢強死
之魂腐史傳中遂重專家之學然而鴻術淵深稀聞九
折鯁生膚受罕究六微造脈訣而掩眞熟湯頭而獵食
三停略辨甯知握虎之功五藏何辜乃類夢羊之踏鑿
陳冰於篋裏以寒益寒熱石火於擔頭以熱增熱徒使
驅魂東岱促景西山此梁皇所以有用勸之文班史所
以著中醫之諺也夫鵠兄視色殆絕言詮龍叔見心或

非實錄語其十全之要無若五診之方是故經著奇脉
道傳摩息臨淄故吏知奉劒之將亡東莞國工雖扇幕
而可試洞見癥結豈煩竹筵之披色類茲青便刻韭英
之候豈有帷中婦寺不辨陰陽夢裏鈞天罔知血脈而
能乞靈於萬金之藥一禽之戲者乎徵之司馬青箱世
業金匱功臣得儒門事親之道有上醫治國之材讀抱
朴之書能知一牝二牡入皇祐之試可對十道六通旣
廣鐫夫善本以嘉惠於後人茲復發鄴侯之架採三萬
卷之藏書起軒后以來萃百十家之名論鈎元提要匡
謬訂訛盡度金針勤宣木舌撰爲脈學四種洵足闡靈
蘭之大義挾長桑之秘言作仁術之慈航示良工之大

璞矣雖然醫之道通於神明脈之理窮極要眇或類珠
之轉盤或如石之投水或循竿而循羽或如弦而如鈞
蝦游冉冉起伏狀於重淵雀啄丁丁斷續擬之屋漏故
黃帝曰若窺深淵而迎浮雲叔微曰意之所解口莫能
宣自非善解天竅證之人事課得失於寸心析毫釐於
千里則泥古者之契舟求劍與離經者之槌墮索塗其
謬一也苟明乎此而讀司馬是書思過半矣時在光緒
二十二年歲次丙申仲冬月

賜進士出身

誥授資政大夫二品頂戴江蘇淮揚海兵備道通家生

謝元福撰

脈義簡摩

八卷



激之前輩同年既彙刻脈經本草經難經諸書表章遺
籍嘉惠來學俾醫有繩尺病無天枉卓然盛心已頃復
示所著脈簡若干卷命與文敘之夫醫之爲道最尊其
術至難不易三品之藥金石草木之性能生人亦能殺
人醫操生殺之權莫尊於是自軒岐以逮漢晉隋唐醫
學家方書汗牛充棟文字之淵奧與治法之微眇淺儒
膚學開卷膏然莫難於是至所藉以行其道而施其術
者獨有切脈一端病狀萬殊呼吸千變欲其手與心合
氣與神通卽脈以審證隨方以奏效非夫精研古籍神
明於古人之法安所執以爲定衡耶世徒以醫卜星相
並稱而醫之尊者賤業醫者不識古書隨俗臆決而醫

之難者易內經之言曰下工切而知之今世果能切脈以知病則固儼然上工也脈經廢而脈理不明脈訣脈學行而脈理愈晦前輩脈經之刻信古人功臣矣脈簡之作其殆今世導師乎曩者先大人善以醫術濟人生平持脈精審壹以古經爲斷興文謫陋愧不能承家學前輩以名進士來官河上雅好博古迺復啟扁洞窻於醫門是編卽壽身之益溥爲壽世之資意在執簡以馭繁非世之所爲因陋就簡者興文雖不克明言其所以然要其綜古法而擇之精本心得而言之有當脈理之謬茲可埽蕩廓清矣艱辭不文敬書簡端以復

光緒十八年壬辰孟秋歛年侍許興文拜序

脈義簡摩序

昔人謂脈之理微如窺深淵而迎浮雲診之道不誠難矣哉軒岐倉扁仲景元化諸聖發明脈理雖散見於諸書而迄無專帙以昭示來許亦醫林中大缺陷也晉太醫叔和王氏獨出手眼著脈經十卷條分縷析洵爲醫學津梁詎六朝高陽生託名叔和著爲脈訣由是家絃戶誦只知僞訣而叔和真本遂晦明代李瀕湖因復著脈學其大旨本之脈經參以己見編成詩歌以便記誦亦未始非濟世之苦心第其所載褊淺簡畧遺漏頗多童年習之又幾祇知有脈學不知有脈經而叔和真本愈晦非斯世斯民之厄運乎步蟾壯年搜輯叔和佚書

手錄數過卽思付梓行世奈未窺全豹加以阮囊羞澀
心長力短迄今墓木已拱壯志愈墮自分此生無復餘
望壬辰秋末路過袁江獲睹激之司馬於官寓喜談醫
理而尤精於脈滔滔汨汨口若懸河於義軒後數百家
言如指諸掌旣不惜重貲將叔和脈經原本暨唐宋元
諸名家醫籍世無傳本者次第付梓公諸海內矣又復
擷前賢數十家脈學之精華參以己所閱歷者細心討
論輯成脈簡八卷窮源竟委無美不臻索隱鉤深無疑
不析蓋其藏書旣富而精神學力又足以赴之其以一
片婆心而爲渡世之慈航公殆叔和之後身歟夫公以
閱閱世家少年高第文章名貴臺閣風裁世俗風塵一

毫不染而獨究心於醫每遇大證羣醫束手輒一二劑
起死回生孫真人狄梁公一流人物今何幸及身見之
異日調和鼎鼎變理陰陽其痼瘵乃身之心臻一世于
太和所謂上醫活國者將爲公預卜焉步蟾鴻爪印泥
行李匆匆聊弁里言以誌欽慕之忱云爾

光緒壬辰秋九月下浣海鹽懶閒居士秋圃王步蟾拜
識時年七十有三

脈簡自敘

瀕湖李氏箸脈學歌訣其書於脈理何所發明而天下
爭奉之爲圭臬者徒以其簡而已簡者便於省記不待
思索已若有得不煩博攷已若有餘然自是以來講脈
者無勞心苦思之功而脈法中少心得之士矣故吾謂
脈學出而脈法壞也雖然大易之言曰簡則易從易從
則有功簡顧可忽乎哉與其繁而橫決支離無當毋寧
簡而空疏意象虛涵猶可任有志者之深思而自得也
且天下人心風氣日趨便捷矣而獨持其繁且拙者斷
斷焉以號於世不亦僨乎故居今日而欲挽回天下之
積習以反於大中至正之路非導之以簡不爲功醫特

其一端也李氏之書其太簡矣吾之書以簡治簡所謂從治者也夫斯簡也其原出於內經難經傷寒論金匱方論脈經甲乙經千金方翼方及宋元以來至於近世名賢與夫日本泰西諸國著述參閱者五六十種凡四百餘卷撮而記之而後乃成斯簡者也考之於古而有所本反之於身而有可信徵之於人而無不合斯施之於病而無不明矣夫是之謂簡光緒壬辰新秋澂之自記

凡例

一自古闡論脈法脈理之書自以脈經爲得正傳而具大觀診家寶笈無踰於此後世脈書惟嬰鑑樞要石頑三昧二書發揮精透次則士材正眼景岳脈神尙有可觀茲集採自內經以下博觀約取必期字字句句皆協於心而適於用其相因之膚詞無據之僻語一概不錄

一是書專論切脈其望聞問三診未暇詳及他日當別爲一書以備四診大法惟婦人小兒兼收察色問證之文因二科文本無多且脈難專恃故聚之以便觀覽

一脈學先求脈體脈體既得進求脈理則於脈之源
流無不了徹而各脈主病無待煩言自能應於無
窮矣故此集於各脈主病稍畧而卷四卷五諸文
亦自可觀神而明之存乎其人

一每篇正文引用經文及前賢名論皆頂書其下一
格及夾雜小注則拙注也獨補義二卷全出臆撰
因前賢書中俱無此種議論卽有之而亦未暢不
得不獨出手眼將平日讀書臨證管窺所及畧抒
於此以質海內

一凡前賢名論膾炙人口而揆之事理不能確信者
必敘出所以難信之故不敢隨聲附和甘受古人

之欺而自欺以欺世也若夫有意掊擊以炫新奇此經生浮薄之習也妄詆前賢定遭天譴

一有一說而義理彼此相通者勢不能處處皆錄其說以致繁複故詳畧互見者必然之勢也果統觀全書而融會之自無憾於闕畧矣

一讀書固不可死於句下然初學入門却須字字句句求其著落徵之人事確有實際方可漸期深造自得若開口便海闊天空自矜融會談理有餘徵事不足於心無得於事無濟名士欺世之術豈有當於太醫司命之業耶故此書於翻衍河洛八卦之說概不闌入

一醫以養親爲急古來明醫多出於此故壽親養老
儒門事親諸書君子重其義矣洋煙乃近時之通
患無古法之可師瘡疽亦苦海之難堪宜救援之
有術故第六卷名論彙編獨詳三者

一是書當分四截看前五卷援先哲名言佐以詮釋
由淺入深有條不紊爲第一截第六卷摭拾名論
以補前五卷所未備也爲第二截七卷婦科八卷
兒科以證爲題與前六卷體例稍別爲第三截補
義二卷或推暢舊論或抒發新思又以補前八卷
之大義者也爲第四截此書如層巒疊嶂得其脈
絡自堪引人入勝非如一邱半壑一覽而盡